

77. Ita potentia sua, quæ viam a libris sacris præscriptam sequebatur, contendens, factus est regum rex, ut INDRAS deus est deorum.

78. Appellabant eum mundi custodum quintum, quia eadem ac illi agendi ratione utebatur, magnorum elementorum sextum, montiumque eximiorum octavum.

79. Ut dei INDRÆ iussum, sic reges illius mandatum tabulæ inscriptum tenebant capitibus suis, a quibus longe remota erat umbella regia.

80. Sacerdotes in magno sacrificio tanto præmio ornavit, ut illius atque KUVERÆ nomina paria evaderent.

81. INDRAS pluviam suppeditabat; YAMAS nimiam morborum vim cohibebat; oceani dominus navigantibus ad negotia sua peragenda iter faustum dabat in undis; KUVERAS, reges priores respiciens, postea etiam thesaurum adaugebat: ita mundi custodes erga illum se gerebant, ac si sub ejus sceptrum refugissent.